

## **SURA YA KWANZA**

### **MAFANIKIO YA KIUCHUMI NA KIJAMII YA MIAKA 10 YA SERIKALI YA AWAMU YA TATU**

10. Hali ya uchumi na huduma za jamii haikuwa ya kuridhisha wakati Rais Benjamin W. Mkapa alipoingia madarakani mwaka 1995. Ukuaji wa uchumi ulikuwa 3.6%, mfumuko wa bei ulikuwa juu kwa kiwango cha asilimia 27; mapato ya Serikali yalikuwa ya wastani wa shilingi 25 bilioni kwa mwezi; uhusiano wa Tanzania na wahisani wa nje ulikuwa umeathirika vibaya; hali ya elimu na afya haikuwa ya kutia matumaini; na miundombinu ya kiuchumi na kijamii ilihitaji ukarabati na matengenezo makubwa.

11. Miaka kumi (1995-2005) ya Awamu ya Tatu ya Serikali ya CCM imeshuhudia kazi kubwa ya kurekebisha uchumi, kupitisha sheria za kuimarisha usimamizi na nidhamu katika ukusanyaji na matumizi ya fedha za Serikali, kuziba mianya ya rushwa na kuunda na kuimarisha vyombo vya kupambana na rushwa. Kutokana na kazi hii kubwa na nzuri iliyofanywa na Serikali chini ya uongozi shupavu wa Rais Mkapa hali ya uchumi imeanza kuimarika na kuwapa wananchi matumaini na huduma za jamii zimeanza kuridhisha.

12. Katika kipindi hiki cha Awamu ya Tatu ukuaji wa uchumi umefikia asilimia 6.7; mfumuko wa bei umeshuka kutoka asilimia 27 mwaka 1995 hadi asilimia 4.5 mwaka 2005 mwanzoni; mapato ya Serikali yameongezeka kutoka wastani wa shilingi 25 bilioni kwa mwezi mwaka 1995 hadi shilingi 160 bilioni kwa mwezi katika nusu ya kwanza 2005; miundombinu ya barabara za lami na madaraja ya kisasa yamejengwa katika kipindi hiki kuliko katika kipindi kingine chochote katika historia ya nchi yetu; upanuzi wa vyombo vya habari na mawasiliano ya simu za mkononi yameiweka Tanzania katika nafasi ya kupigiwa mfano katika Afrika.

13. Kutokana na mafanikio ya kiuchumi ya Serikali ya Awamu ya Tatu, na umahiri wa uongozi wa Taifa wa kujenga uhusiano mwema

na nchi na mashirika ya kimataifa, nchi yetu imeweza kufanya mapinduzi makubwa katika sekta za elimu, afya, miundombinu n.k.

14. Mfano mzuri unajitokeza katika sekta ya elimu. Pamoja na mafanikio mengine katika sekta hii, idadi ya wanafunzi wa shule za msingi imeongezeka kutoka milioni tatu na nusu mwaka 1995 na kufikia zaidi ya milioni saba na nusu mwaka 2005. Wakati huo huo wanafunzi wa shule za sekondari wameongezeka zaidi ya maradufu kutoka wanafunzi 190,000 mwaka 1995 hadi wanafunzi 520,000 mwaka wa 2005.

15. Mafanikio katika sekta ya elimu ni kielelezo cha mafanikio katika sekta pana ya huduma za jamii. Kipindi cha Serikali ya Awamu ya Tatu kimetoa mifano mizuri ya mafanikio katika sekta ya afya; kwa mfano upatikanaji wa dawa katika hospitali, vituo vya afya na zahanati za Serikali umeongezeka sana kwa vile kiasi cha fedha kwa ajili ya ununuzi wa dawa na vifaa kimeongezeka kutoka shilingi bilioni 10 mwaka 2000 hadi shilingi bilioni 30 mwaka 2004/05. Aidha, huduma za chanjo kwa watoto zimeimarika na kuongezeka kutoka asilimia 30 mwaka 1995 hadi asilimia 90 mwaka 2004. Pia Wilaya zote zimepatiwa *X-ray, ultra-sound machine* na majokofu mapya.

16. Serikali ya Awamu ya Tatu itakumbukwa pia kwa kazi nzuri iliyoifanya katika sekta ya maji kwa kupanua na kuongeza upatikanaji wa maji nchini na pia kwa kuanzisha miradi mikubwa ya maji kama ule wa kutoa maji ya Ziwa Victoria na kuyapeleka katika mkoa wa Shinyanga, mradi wa Maji wa Chalinze katika Mkoa wa Pwani na mradi wa Maji wa Dodoma Mjini.

17. Kazi nzuri ya Serikali ya Awamu ya Tatu ni jukwaa litakalo iwezesha Serikali ya Awamu ya Nne kusimama na kuchupa ikiongozwa na Ilani ya CCM ya 2005-2010 kuelekea mafanikio makubwa zaidi ya maendeleo ya uchumi na jamii ya nchi yetu na watu wake.